

Oqallinneq torernerusoq pisariaqarpoq

Nunatsinni nunaqarfissitsitertarnerup oqallisiginerani sammineqatariaqarsoraara qanoq iliorluta inunnut amerlanerpaanut pitsaanerpaamik atugassaqartitsilersinnaanersugut aqputissiuussinnaaneripput. Meeraneq toqqissisimanartoq nuannersorlu qanoq qulakkeerneqarsinnaava? Atuarfeqarneq ilinniartitaanerlu pitsaanerpaaq. Isumaginninnikkut toqqissisimaneq. Ilaqutariinnut meerartalinnut atugassaritinneqartut pitsaanerpaat. Suliffissat ajunngitsut. Peqqinnissaqarfiup sulisussaaleqinngitsup qulakkeernissaa. Ilaqutariit tamarmik inis-saqartinneqarnissaat. Isertitatigut naligiinnerulernissaq. Sunngiffimmi kulturikkullu neqeroorutit pitsaasut. Sukisaarsarfissaqarluarnissaq. Ataqqinartumik utoqqalinissaq. Naatsumik oqaatigalugu nunatsinni inuiaqati-giinni pitsaanerpaamik atugarissaarluni inuuneqarnissaq qanoq iliornitsigut aqputissiuussinnaavarput, Ka-laallit Nunaanni namminersulersumi.

Tassa apeqqut.

Ajortumik isumaqartoqanngilaq

Isumaqarpunga inuit eqqarsarluarsinnaalaartut amerlanerit nassuerutigereersimassagaat inuup moderniusu-mik inuuneqarusuttup pisariaqartitai piumasaalu tamaasa nunaqarfeeqqaani naammassineqarsinnaajunnaar-simasut. Nunaqarfinni inuuneq nikanarsarniannigilara, aamma nunaqarfinni inuttut atugarisatigullu ajunngit-sorpassuarnik peqarpoq, naleqartillugillu ataqqisatsinnik. Tamanna qularutigineqassanngilaq. Piffissasrli nallertussaavarput ukiunut nutaanut naleqqussarfissarput, silaannaap allanngornera, inuussutissarsiutit al-lanngorneri pissutigalugit minnerunngitsumillu silsarsuarmioqataanitsinnut nalimmassartariaqaratta. Tamak-kua oqallisiginissaat pisariaqarpoq, immitsinnulli ataqqeqatigiilluta oqaloqatigiittariaqarpugut. Oqaloqati-giinnikkutta unittuussaagut. Tamatsinnut ajunngitsussaq anguniarlugu oqallittariaqarpugut, ajortumeeriniar-toqanngilarmi.

Meeqqat Nunatta siunissarai

Sammineqarsinnaasorpassuupput. Assersutigaligu akuersaarneqartuaannassava meeqqat inuusuttuaqqallu nunaqarfimmiut atuartitaanermut periarfissaat illoqarfimmiunut naleqqiullugit appasinnerujuaannarnissaat? Ilinniartitsisussat ilinniarsimasut pissarsiarisinnaanngikkaanni taava suut allat periarfissaappat? Meeqqat siunissaat qulakkeerniarlugu illoqarfimmut sunngiffimmittaapq periarfissaqarnerusumut inuusuttoqarnerusu-mullu nuukkaanni pitsaanerunnginnerluni? Qanoq inuusuttut isumaqarpat?

Inuussutissarsiutit allanngorneri

Sammineqarsinnaasut allat tassaapput piniarnermik inuussutissarsiuteqarnerup siunissami qanoq ineriartor-teqqinneqarsinnaanera. Aalisarnermik inuussutissarsiuteqarnerup aaqqissuuteq-qinneqarnissaanik suleqati-giissitarsuup isumaliutissiissutaa aamma oqallisissaqissorujussuuvoq, kiisalu aatsitassarsiornermik inuussu-tissarsiuteqalernissaq. Qanoq suminngaannillu sulisussat naammattut pissarsiarineqassappat. Aalisarnermik aaqqissuusseqqinnissamik isumaliutissiissutit innersuutigaa aalisarnikkut suliffissuaqarneq ikinnerusunik anginerusunilli ingerlanneqalissasoq. Suliffissuaaqanunut tamanna qanoq kinguneqassava? Pinairnermik aali-sarnermillu inuussutissarsiortut qanoq isumaqarpat?

Ataqqinartumik utoqqalineq

Alla tassaavoq qanoq iliornikkut ataqqinassuseqartumik utoqqaliartortarneq qulakkeerneqarsinnaanersoq. Ataqqinassusilimmik toqqissisimanartumillu utoqqaliartortarnermi pisariaqartut tassaapput pitsaasumik isuma-gineqarsinnaaneq, peqqinnissaqarfik isumannaatsoq, inuuneq imaqarluartoq qitornat ernguttallu qanimut najorlugit. Utoqqaat qanoq isumaqarpat?

Nunaqarfiit atajuvarumaarput

Qularinngilara nunaqarfiit ukiorpassuarni atajuvarumaartut, naak ikinnerulersimassangaluarlutik. Pisariaqar-porlu nunatsinni innuttaasut siunissarput pillugu oqallisiginissaat, torersumik, immitsinnut ataqqilluta tusaa-niarlutalu. Oqallinnerup siumut qanoq inerineqarnissaa aalajangiuteriinnikkaluarlugu oqaloqatigiittoqarsin-naavoq. Nunaqarfiit aap naaggaluunniit kisimi pineqanngilaq, tassaasariaqarlunili Kalaallit Nunaanni nam-minersortumi innuttaasut amerlanerpaat atugarissaartuunissaat qanoq iliorluta aqputissiorsinnaaneripput.

Inussiarnersumik

Juaaka Lyberth
alaatsinaattoq